

**Sujet:****Läng nid an my Wurscht!**

Es isch emool e Seili gsi,
läbt bio-gsund, das wisse Si,
by Buurelyt im Baselbiet,
däm Land, wo Milch und Honig bliet.
Im ob're Ländli uff 'me Hoof,
s het Katze, Kieli, Hund und Schoof,
gumpts freelig dussen ummenand,
entdeggt das gspässig Buureland.
An dr frische, wirzige Luft
suult sich s Seili im Gryterduft.
S frisst vyl Graas, vom vegetarisch,
null Hormon, das syg barbarisch.
Het die Sau gnueg Spägg am Ranze
darf si nimm im Garte danze.
Me git e Fungg oder e mail
em Metzger, ass är schlyfft sy Beyl.
Statt iber s Kepfli mit em Stogg,
bedeibt mes mit Eleggroschogg.
Non em Bruscht-Stich s grooss Gebimmel,
säilig schwäbt die Sau in Himmel.
Zem Coiffeur goots ins Wellnessbaad
entborschtet wirds by 60 Graad.
D Hut goot ab, me duets entglaide
und au fachgerächt entwaide.
Zerleggt in synen Ainzeldail
bietet mes gly im Laade fail.
Kaufe kasch das Seili-Schätzli
as Wurscht, Schinggen oder Blätzli.
Au dr Schwyynskopf häts no z biete
doo drvor dien mir uns hiete.
Eerli, Schneerrli oder Gnaagi
au e Bättler nit dra naagi.
Mir ässe Fleisch vom Bessere
vom Rind und vo de Ressere.
Filet, Entrecôte und Schnitzel,
d Bryyse sinn e Närkeitzel.
Doch mir kennen uns das laische,
wenn nit alli, doch die maischte.
Und fir em Landschäftler sy Znacht
stifte mir s Dramm Nummeren Acht.
Doch Wirscht gits nit nur vo dr Sau,
Rind und Lämmli schlachtet men au.
Verwurschtet wird in jeder Form,
die Wirscht wos git, es isch enorm.
Glepfer, Salami, Lääberkääs,
e Wienerli bevorzugt Ääs.
E Wysswurscht z Minche zem e Bier
und s Corned Beef vom Biffeldier.
E Schüüblig griegsch zer Uniform,
mit ere Lengi, ganz abnorm.
Uussteller sinn e groosse Hit,
vyl besser as dr Wurscht-Uffschnitt.
Salsiz und au Salamettli
griegsch mänggmool zem e Raggettli.
S git die uss Bluet und Lääbere
zem im Maage z verglääbere.
Ganz feyn isch dr Schwartemaage,
Präskopf isch nur schwäär z verdraage.
S rieht e Baselbieter Herold
'By öis gits Würscht, die sy uus Gold.'
Im Loonhoof im 'Au Violon'
serviere si Dir Saucisson.
Uss Innereye, ai wie pfui,
wurschte si Häggis und Andouille.
An dr Mäss uff dr Calypso
bisch so scharf wien e Chorizo.
Dr hungrig Mensch, es isch verruggt,
vo Wirscht und Fleisch vyl z vyl verdruggt.
Daas hänn Gescheyti uusegfunde
und grad in e Studie bunde.
Die verbraltet Angscht und Schregge,
ass aim d Wurscht im Hals blybt stegge.
Denn die, so sait dä Fleisch-Alarm,
zaigt Risiko im digge Darm.
Wie uff d Raucher, unverfroore,
goots jetz loos uff d Karnivore.
Me muess es glaube, s isch fascht soo,
s kunnt schliesslig vo dr WHO.
Die will jo wiirgglig numme s Besch,
kai Mumpf, kai Gräbs, kai Ruer, kai Pescht.
Wie synerzyt bym Rinderwaan
kunnsch dr vor wien e Bleediaan.
S het die glychi Gsundhaitssippe
erfunden au e Vogelgrippe.
Die isch erfolgloos, wie De waisch,
gfäärlich sinn jetz Veegel uss Fleisch.
Ob relatyf, ob absolut
s Risikogschrey isch scho rächt lut.
Wie Rauchen und im Huus Asbest,
s Ässe vo Wirscht syg gar nit s Besch.
S Comité duet duregryffe:
nimm darf me dr Hanswurscht pfyffe.
Und uss dr Scharaadekische
sottsich dr Blätzli uusemische.
D Seibi-Glygg vom Barfi ääne,
steggt scho lang in Quarantääne.
Verbiete sott me s Liedli au,
das vom 'Louis Du alti Sau!'
Bschtellsch im Mutz e Frigadelle,
darfschs em Doggter nit verzelle.
Är duet Di vegan beschimpfe
und grad geege Dollwuet impfe.
Uns isch das glych, mir pfyffe druff,
au d Drummler macht das gar nit muff.
Zem stillen unsre Fasnachts-Durscht
gits Bächer und die breetlet Wurscht.
Ka sy, ass alles daas isch Gschicht,
will unsri Metzger het au scho 'dicht'.

D Ladäärne-Uusstellig uff em Minschterplatz und d Waage- und Reggwisyte-Uusstellig bi dr Kasäärne sin vom Määntig znacht bis am Mittwoch demoorge! Deert und an de 3 Verkaufsständ (GINS) in dr Stadt ka men au alli Zeedel und Schnitzelbängg, d Blaggedde und dr Rädäbäng kaufe. Am Fritig und Samschtig, 19. und 20. Februar 2016 isch Noochwuggswärbig vo dr 1. Lektion im Zält uff em Barfi. D'Zeedellääsete isch am Sunntig noo dr Fasnacht 2016 am 21. Hoornig vom Fimfi bis am Siibeni zoobe, in dr Baseldytschi Bihni (im Lohnhof). Dr Ytritt isch vergäabe. D Foyer-Bar isch vom Vieri ewägg offe.